

【经文信息】大正藏第 21 册 No. 1363

胜幢臂印陀罗尼经 1 卷

No. 1363 [No. 1364]

胜幢臂印陀罗尼经

唐三藏法师玄奘奉 诏译

如是我闻。一时薄伽梵。在鸡罗山顶天仙神宫。与大苾刍众千二百五十人俱。及无量无数菩萨摩訶萨。曼殊室利跋陀波罗。十六大士而为上首。并诸天入阿素洛等。大梵天王而为上首。无量大众前后围绕。

尔时世尊住正念智。为诸大众说微妙法。时大梵王率诸天众。阿素洛等顶礼佛足。合掌恭敬住如来前。俱白佛言世尊在昔。为欲利乐诸有情故。求证无上正等菩提。悲愿熏心成等正觉。有大神力具大慈悲。何故现见诸有情类。堕在地狱饿鬼傍生。及人天中受诸剧苦。不设善巧方便济拔。惟愿哀愍令脱苦难。时观自在亦率无量持呪天仙。顶礼佛足合掌恭敬。住如来前俱白佛言。唯愿哀愍诸有情故。开示善巧拔苦难法。

尔时世尊告二大士及其眷属。汝等就座。吾今愍念一切有情。略说善巧拔苦难法。汝应谛听极善思惟有大陀罗尼名胜幢臂印。若常诵念能灭五逆十恶等罪。终不更受诸恶趣生。及人天中所有极苦。恒受持者现得财位。于当来世生尊贵家。所欲现前受诸快乐。常值诸佛得宿命念。乃至无上正等菩提。陀罗尼曰。

羯洛羯洛 枳利枳利 矩路矩路 萨洛萨洛 徒利徒利 速路速路 萨缚佛陀婆 卢枳谛 达洛达洛 萨缚达摩路迦目契 折洛折洛 萨缚僧伽地瑟耻 谛 跋洛跋洛 頹泥迦佛 陀俱胝婆史谛 厕拏厕拏 萨缚羯摩筏刺拏祢 莫摩萨缚萨埵难遮 萨婆波耶尼 萨缚独佉波捺耶 勃栗咤勃栗咤 达栗咤 达栗咤 捺咤捺咤 羯咤羯咤 飒怖咤耶飒怖咤耶 萨婆筏刺拏波耶突揭底尼 莎诃

善男子此胜幢臂印陀罗尼。是殑伽沙等诸佛共说。吾今愍念一切有情。因汝等请亦为众说。善男子诸佛出世甚为难遇。善得人身复难于是。闻此神呪更复为难。若有善男子善女人。能正受持尚为难得。何况书写精勤诵念。及劝他人令受持者。善男子我念过去。曾于药师琉璃光胜观等诸佛所。闻此神呪受持读诵正为他说。由此证得无上菩提。是故汝等应随勤学。劝诸有情受持读诵。令脱苦难获胜利乐。

时薄伽梵说此经已。曼殊室利菩萨跋陀波罗菩萨观自在菩萨。大梵天王及诸天阿素洛等。一切大众闻佛所说。皆大欢喜信受奉行。

胜幢臂印陀罗尼经

【经文信息】大正藏第 21 册 No. 1363 胜幢臂印陀罗尼经

【版本记录】CBETA 电子佛典 Rev. 1.7 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
